

潛

山

集

—

卷

三

第

一

潛山集

四庫全書珍本初集

別集

集

類部

詳校官庶吉士臣李傳熊

主事臣呂雲棟覆勘

商務印書館  
中央圖書館  
復委託景林  
所藏之洲閣本

膳錄監生臣陳

祚

膳錄監生臣沈

霽

欽定四庫全書

集部四

提要

潛山集十二卷

別集類三

宋

臣等謹案潛山集十二卷宋釋文珣撰文珣

於潛人其生平遊歷畧見於所作舊遊一百

十韻詩中大抵出家於杭州遊于湖州因而

遊浙東至閩由金華嚴陵返越北又至毘陵

陽羨金陵淮甸而止後仍歸杭州遺讒下獄

久之得免遂遁跡不出以終集中有又看景  
定新頌朔百歲還驚五十過句知其生於宋  
寧宗嘉定三年辛未宋亡時年六十六又杭  
州薦福寺記題至元乙酉二月遣興詩稱七  
十七歲潛山翁則至元丁亥尚存其行事則  
下少槩見惟咸淳臨安志載咸淳三年九月  
二十四日賈似道至小麥嶺於德顯慶寺游  
山題名中列衲子四人文珣與焉疑亦托跡

朱門者然集中過似道葛嶺舊居詩極詞詆  
斥若有餘憤而紀事一詩作於似道初敗時  
其序言似道位亢志驕陰謀篡逆言洩于夏  
金吾金吾欲誅之懼而宵遁云云雖與宋史  
所載夏貴請死守淮南似道奔還揚州之事  
不甚相符而抉摘隱惡至加以曹瞞代漢之  
罪非似道之黨可知且集中獨吟之作十之  
九倡和之作不及十之一所與倡和者又不



過褚師秀周密周璞仇遠數人皆一時高人  
文士亦足徵非干謁之流或似道重其名衲  
游山邂逅偶挈同遊遂題名賓從之未亦未  
可定也其詩多山林閒適之作比興未深而  
即事諷喻義存勸戒持論率能中理觀其哀  
集詩稿一篇有云吾學本經論由之契無為  
書生習未忘有時或吟詩興到即有言長短  
信所施盡忘工與拙往往不修詞惟覺意頗

真亦復無邪思其宗旨品格可以具見矣厲  
鶚宗詩紀事所錄釋子凡二百四十人顧嗣立  
元百家詩選所錄釋子集凡十五家皆無其  
禪藻一集蒐羅頗富亦不登其一字則是集  
之佚其來已久今從永樂大典哀輯得詩尚  
近九百首宗元以前僧詩之工且富者莫或  
過之乾隆四十六年九月恭校上

總纂官臣紀昀臣陸錫熊臣孫士毅



欽定四庫全書

潛山集卷一

宋 釋文珣 撰

四言古

堯任舜禹行

堯任舜禹聖化日熙二臣至德惟堯克知明良胥會徵庸弗疑佐命垂統股肱綱維行堯之道蚤夜孳孳上齊七政大錄萬幾與人為善念茲在茲舉相去凶咨牧授時執德於心其化若馳洪水滔天浩浩無涯下民昏墊

荒度為宜乃乘四載奠決刊隨櫛風沐雨手胼足胝四海會同九澤具陂誕敷文德帝命是祇翔泳咸若鳳皇來儀堯嘉厥功翕受敷施同聲相應百僚師師是知官人安危之基用賢則安用佞則危惟彼陶唐百工允釐後世有述先天弗違能賞能禪繼承伏犧為民之極黃收純衣明並日月照臨無私不言而治端拱無為民無能名蕩蕩巍巍惟天為大惟堯則之先聖斯言當深致思或未之思室是遠而

天地無窮行

天地無窮人處于中三才既兆庶類皆通至聖立極萬  
方所宗如星拱北如水朝東垂衣而治天下為公孝慈  
道廣是謂大同自茲而降謀用是崇兵由此起彊弱相  
攻上下分亂莫知適從匪茲禮義曷能靖共順之者吉  
逆之者凶不能率此斯曰顛蒙窮通得喪實維降衷巧  
愚不與係於遭逢毋肆小智以苗厥功安時處順於焉

考終

天道夷簡行

天道夷簡蕩蕩巍巍人心不然大行險巇轉眼翻覆誠  
不易知忠或見疎信或見疑離間致入寧復顧思昔者  
繾綣終焉棄遺聖如周公王猶不知孝若申生姬能死  
之在彼盛時尚有爾為况乎季世顛倒是非讒人飽祿  
志士苦飢俯仰今古其誰不悲命懸于天逆之為嗤沖  
靜無患進取必危守道安危其殆庶幾禍福之兆可以  
理推夷齊去周西山採薇黃綺避秦商巖茹芝景行先

哲良足為規規而罔念雖悔何追

天道雖遠行

天道雖遠人心匪殊內直不欺與天為徒對越無愧陟  
降恒俱祝史陳言曾非矯誣桑林之禱金縢之書至誠  
感通如鼓應桴神人以和大信以孚不勉不思自止于  
符天有常道人無異塗志斯一矣天其遠諸大道既濶  
人心日渝背天從欲覆族亡軀作善降祥為惡速辜聖  
言孔彰是訓是謨一念之差千里而迂惟當自修以反



厥初

別日何易行

別日何易會日何難道路修阻山川鬱盤寤寐懷思涕  
泣汎瀾思君不已損我容顏時歌舊章期以自寬歌終  
太息反開憂端孤鴻嘹唳過彼雲間欲托遺音遐征不  
還出戶徘徊風露淒寒明月皎皎星斗闌干羅帷飄揚  
顧影難安耿耿長夜摧此心肝

北遊朔城行